

摘藻堂四庫全書薈要

史部

欽定四庫全書薈要

史部

文獻通考卷九十八

詳校官員外郎臣潘紹觀



欽定四庫全書薈要卷九千四百十八

史部

文獻通考卷九十八

鄱陽馬端臨貴與著

廟考八

祭祀時享

宋制太廟歲以四孟月及季冬凡五享朔望薦食薦新  
三年一祫以孟冬五年一禘以孟夏

開寶初上親享太廟見所陳籩豆簠簋問曰此何物

也左右以禮器對上曰吾祖宗寧識亟命徹去進常膳如平生既而曰古禮不可廢也命復設之於是判太常寺和峴言按唐天寶中享太廟禮料外每室加常食一牙盤五代以來遂廢其禮今請如唐故事乃詔別設牙盤食褹袷時享皆用之

太宗端拱二年七月詔以今年八月二十四日親享太廟會有彗出東井詔罷其禮

仁宗慶歷時四孟臘時享太廟攝事用羊豕各二祈報



象罇一別廟增黃彝壺尊二親享則加犢

三年御史蔡稟言周制四時享親之禮有九今寺觀則車駕一歲再臨未嘗薦獻宗廟非奉先教民意帝謂輔臣曰三歲一祠郊廟而賚及天下若歲親行之則人有覲賞之心朕朝夕奉三聖御容於禁中未嘗敢怠也

太廟舊唯薦冰景祐二年趙良規請薦新如通禮宗正寺禮官參定正月韭菰卯二月冰三月筍含桃四月麥雥五月瓜來禽六月菱芡七月栗榛鷄棗梨八月酒稻

菱九月小豆蕎麥十月兔栗藟與十一月鴈麋十二月  
魚增二十六種禮院因奏禮有薦新如朔奠自頃有司  
言宗廟則后廟可兼遂上前廟帝主薦冰請后主奉慈  
后廟四時薦新如朔望牙盤食例宗正寺官充攝行禮  
詔可

神宗元豐三年詳定郊廟奉祀禮文所言祠禴烝嘗之  
名春夏則物未成而祭薄秋冬則物盛而祭備故許慎  
以品物少文詞多為祠而王弼以禴為祭之薄何休謂

祈穀成者非一黍先熟可得薦故曰嘗冬萬物畢成所  
薦衆多故曰烝故禮記以嘗為大嘗周禮以烝為大烝  
孔安國亦以烝嘗為大亨今太廟四時雖有薦新而孟  
享禮料無祠禴烝嘗之別伏請春加韭卯夏加麥魚秋  
加黍豚冬加稻鴈當饋熟之節薦於神主其籩豆於常  
數之外別加時物之薦豐約各因其時以應古禮從之  
又言薦血之器禮所不載唐崔沔議曰毛血盛於槃  
宋書志南郊以二陶豆盛毛血開元開寶通禮及今

儀注皆以豆盛之禮以豆盛菹醢登盛羹其薦毛血  
當以槃親享太廟但有三牲骨體俎而無腸胃膚俎  
不應古義請於三牲骨體俎之外加以牛羊腸胃及  
豕膚俎各一古者祭祀無迎神送神之禮其於祭之  
未皆不拜按少牢饋食禮主人朝服即位於阼階東  
西面鄭氏曰為將祭也即不言拜及祝告禮成主人  
出立於阼階上西南亦不言拜近代事神拜而迎送  
殊非禮意請改定儀注聖王之事宗廟禮如事生故

饌則薦四時之和氣與四海九州之美味貢則陳金  
璧龜帛以明共天下之材其餘無常必致國之所有  
以明遠物無不至自秦漢以來奉宗廟者不本先王  
之經訓有司奉行充其位而已故天下常貢入王府  
者未嘗陳於太廟良為閤畧請親祠太廟並令戶部  
陳歲貢以充庭實仍以龜為前金次之玉帛次之餘  
居後太常禮院言舊儀親祠太廟車駕未至大次  
太祝宮闈令奉出帝后神主置於座行禮畢已還齋

殿方納神主今親祠皇帝至阼階太祝闡令始奉神主置於座行禮畢皇帝俟納神主然後降阼階舊八室帝主各以太祝遷納其后主止命太廟宮闡令二員恐致遲緩請權差七員同奉從之

詳定禮文所言古者宗廟九獻王及后各四諸臣一自漢以來為三獻后無入廟之事相循至今若時享則有事於室而無事於堂禘祫則有事於堂而無事於室室中神位不在與堂上神位不當展有饋食而

無朝踐度今之宜以備古九獻之意請室中設神位於奧東面堂上設神位於戶外之西南面皇帝立於戶內西面裸鬯是為一獻出戶立於扆前北向行朝踐薦腥之禮是為再獻皇帝立於戶內西南行饋食薦熟之禮是為三獻詔並候廟制成取旨

又言王制祭宗廟之牛角握周禮小司徒凡小祭祀奉牛牲天子之祭無不用牛者唐郊祀錄稱宗廟社稷等祭悉用太牢今三年親祠而八室共用一犢及

祫享盛祭有司攝事而不用太牢則為非稱請三年  
親祠并時享有司攝事太廟每室並用太牢詔親祠  
并祫享每室用太牢

又言古者人君臨祭立於阼階者主階惟人君蒞之  
行事示繼體祖考親親之義且以尊別於臣庶也今  
朝享太廟設小次於殿下褥位之東西向設皇帝版  
位於廟東階之東南西向乃是古者大夫士臨祭之  
位殊失禮意請自今太廟行禮並設皇帝版位於東



階之上西向更不設殿下版位及小次又曾子問曰  
斂幣玉藏諸兩階之間聘禮卷幣埋於西階東舊制  
宗廟燔其幣未合於禮請凡禮神之幣皆埋之西階  
東冊則藏諸有司之匱

五年詔自今太廟祠祭前廟初獻差親王宗室使相節  
度使郡王后廟初獻宗室節度觀察留後觀察使歲以  
序差不赴者罰之其餘祠祭勅差行事者准此

六年十一月帝親祠南郊前期三日奉仁宗英宗徽號

冊寶於太廟是日齋於大慶殿翼日薦享於景靈宮禮畢帝服通天冠絳紗袍乘玉輅至太廟宰臣百僚班迎於廟門侍中跪請降輅帝却乘輿步入廟趨至齋宮翼日帝服鞞袍至大次有司奏中嚴外辦禮儀使跪奏請行事帝服袞冕以出至東門外殿中監進大圭帝執以入宮架樂作升東階樂止登歌樂作至位樂止太祝宮闈令奉諸室神主於座禮儀使贊曰有司謹具請行事帝再拜詣罍洗登歌樂作降階樂止宮架樂作至南北

向樂止帝搢圭盥悅洗瓚拭瓚訖執圭宮架樂作升堂  
樂止登歌樂作殿中監進鎮圭帝搢大圭執鎮圭詣僖  
祖室樂止登歌奏瑞安之曲至神座前北向跪奠鎮圭  
於繅藉執大圭跪三上香執瓚裸地奠瓚捧幣奠訖執  
圭俛伏興出戶外北向再拜內侍舉鎮圭以授殿中監  
至次室行事皆如前儀帝還位登歌樂作至位樂止宮  
架興安之樂作文舞九成止禮部戶部尚書以次官奉  
逐室俎豆宮架豐安樂作奠訖樂止帝再詣罍洗登歌

樂作降階樂止宮架樂作至洗南北向立樂止帝搢圭  
盥悅洗爵拭爵訖執圭宮架樂作帝升東階樂止登歌  
樂作至僖祖室樂止宮架樂作帝搢圭跪受爵祭酒三  
奠爵執圭俛伏興出戶外北向立樂止太祝讀冊文帝  
再拜詣次室皆如前儀帝還位登歌樂作至位樂止文  
舞退武舞進宮架正安之樂作亞獻以次行事如前儀  
樂止帝詣飲福位登歌樂作至位樂止宮架僖安樂作  
帝再拜搢圭跪受爵祭酒三啐酒奠爵受俎奠俎受搏

黍奠黍豆再受爵飲福酒訖奠爵執圭俛伏興再拜樂止帝還位登歌樂作至位樂止太常博士徧祭七祀配享功臣戶部禮部尚書徹俎豆登歌豐安樂作徹訖樂止禮直官曰賜胙行事陪祠官皆再拜宮架興安樂作一成止太祝宮闈令奉神主入諸祔室禮儀使跪奏禮畢登歌樂作帝降階樂止宮架樂作出東門殿中監受大圭歸大次樂止有司奏解嚴轉仗赴南郊自元豐初命陳襄等詳定郊廟禮文至是始用新儀

七年詔舊制薦新米麥之屬皆取於市今後宜令玉津  
瓊林宜春瑞聖諸園及金明池後苑供具其所無者乃  
索之雜買務

詳定郊廟禮文所言古者薦新於廟之寢無尸不卜  
日不出神主奠而不祭近時擇日而薦非也天子諸  
侯物熟則薦不以孟仲季為限月令孟夏薦麥孟秋  
薦黍季秋薦稻呂氏月令一歲之間八薦新物開元  
禮加以五十餘品景祐中禮官建議以謂呂紀簡而

近薄唐令雜而不經於是更定四時所薦凡二十八物除依詩禮月令外又增多十有七品雖出於有司一時之議然歲時登薦新物自祖宗行之已久今欲稍加刊定取其間先王所嘗享用膳饈之物見於經者可依舊制存之其不經者去之庶幾不失禮意請自今孟春薦韭以卵饈以葍仲春薦冰季春薦笋饈以含桃孟夏以彘嘗麥仲夏嘗雛以黍饈以瓜季夏以鱖以芡以菱孟秋嘗栗與稷饈以棗以梨仲秋嘗麻

嘗稻饌以蒲季秋嘗菽饌以兔以栗孟冬饌以鴈仲冬饌以麇季冬饌以魚今春不薦鮪實為闕典請季春薦鮪以應經義無則闕之如林檎蕎麥諸菓之類及季秋嘗酒皆不經見宜刪而去之凡新物及時出者即日登獻既非正祭則於禮不當卜日漢儀嘗韭之屬皆於廟而不在寢故韋元成傳以為廟歲二十五祠而薦新在焉自漢至於隋唐因仍其失薦新雖在廟然皆不出神主今出神主則失禮尤甚請依韋



彤五禮精義但設神座仍俟廟成薦新於寢庶合典禮詔依所定如鮪魚闕即以魴鯉代之

八年太常寺言治平四年故事山陵前宗廟輟祭享遇朔望以內臣行薦食之禮俟祔廟畢仍舊今景靈宮神御殿已行上食太廟朔望薦食自當請罷從之

元祐七年太廟復用牙盤食舊制並於禮饌外設常食一牙盤元豐中罷之禮官呂希純嘗建議曰先王之於祭祀皆備上古中古及今世之食所設古器禮饌即上

古中古之食也牙盤常食即今世之食也而議者乃以  
為宗廟牙盤原於秦漢陵寢上食殊不知三代以來自  
備古今之食請依祖宗舊制薦一牙盤及是始從希純  
之議云呂希純又嘗奏唐開元開寶禮每廟室薦獻帝  
后各奠一爵其后爵謂之副爵每堂室只奠一爵帝后  
共享慢神瀆禮莫此之甚請帝后各奠一爵亦如其儀  
焉

徽宗大觀四年議禮局言按太廟儀注春夏用犧樽象

罇秋冬用著罇壺罇各二已應周禮司罇彝之義又每  
享各用大罇二則是以追享朝享之罇施之於禴祠烝  
嘗矣其為失禮明甚請自今四時享太廟不用大罇禮  
記郊特牲曰灌以圭璋用玉氣也周禮典瑞裸圭有瓚  
以肆先王說者謂天地有禮神之玉而無鬱鬯宗廟有  
鬱鬯而無禮神之玉然則宗廟之玉裸圭而已圭瓚之  
制以圭為枋其長尺有二寸黃金為勺青金為外朱中  
央其容五升其徑八寸其勺之鼻為龍首所以出鬱鬯

也其槃徑一尺所以承瓚也今親祀太廟以塗金銀瓚  
有司行事以銅瓚其大小長短之制皆不如禮請改製  
以應古制 十一月太常光祿寺言禮制局新定太廟  
陳設之儀盡依周制籩豆各用二十有六簠簋各八以  
籩二十有六為四行以右為上饎籩二為第一行朝事  
籩八次之饋食籩八又次之加籩八又次之豆二十有  
六為四行以左為上饎豆二為第一行朝事豆八次之  
饋食豆八又次之加豆八又次之簠八為二行在籩之

外簋八為二行在豆之外籩豆所實之物悉如周禮籩人醢人之制惟簋以稻梁簋以黍稷而茅苴以蓴蜆醢以蜂子代之 十二月禮制局言太廟祭器鉶用三登用一竊考鉶與登皆盛羹之器祭祀烹牲於鼎升肉於俎其醢芼以醢鹽蔬實之於鉶則謂之鉶羹不致五味實之於登則謂之太羹周官饔人祭祀共太羹鉶羹是也且宗廟之祭用太牢而三鉶實牛羊豕之羹固無可論者至於太羹止設一登以少牢饋食禮考之則少牢

者羊豕之牲也佐食饌兩鉶司士進涪二豆三牲之祭  
鉶既設三則登亦如其數請太廟設三登實牛羊豕之  
涪以為太羹明堂亦如之

政和四年比部員外郎何天衢言先王建祭祀之禮必  
得疏數之中未聞一日並行兩祭者也今太廟薦新有  
與朔祭同日者夫朔祭之禮行於一月之首不可易也  
若夫薦新則未嘗卜日一月內皆可薦也新物未備猶  
許次月薦之亦何必同朔祭之日哉詔薦新與朔祭同

日即用次日

高宗建炎二年上幸揚州行南郊禮時太廟神主奉於壽寧寺前一日上親詣寺行朝享謝禮禮成恭謝如儀時景靈宮神御奉安於溫州乃差官詣溫州行禮

三年上幸杭州太廟神主併奉安於溫州祭享皆差官攝事以禮器未備五享權用酒脯行禮太廟朔祭每室例用一羊建炎初務省約初用酒脯紹興五年復用羊紹興七年上祀明堂於建康時有徽宗之喪先是太常

少卿吳表臣乞於大祀前二日朝獻景靈宮前一日朝  
享太廟及是援熙寧元年故事謂是時英宗喪未除不  
廢景靈宮太廟之禮請如故事翰林學士朱震以為不  
然謂王制喪三年不祭唯天地社稷得越紼行事監察  
御史趙渙言升祔以後宗廟常祭皆不當廢而當喪享  
廟亦有顯據左氏傳曰烝嘗禘於廟曾子問曰已葬而  
祭此不當廢也詩頌成王即位諸侯來助祭春秋文公  
四年十一月成風薨六年十月猶朝於廟此顯據也疏



奏詔侍從臺諫議吏部尚書孫近等十五人言謹按春秋三十三年傳凡君薨卒哭而祔祔而作主特祀於寢烝嘗禘於廟杜預謂新主既特祀於寢則宗廟四時常祀自當如舊又按景德三年明德皇后之喪改易而服除真宗遂享太廟合祭天地於圜丘熙寧元年神宗居諒闇復用景德故事躬行郊廟之禮則是考古及今居喪得見宗廟將來明堂大禮已在以日易月服除之後前一日皇帝合詣太廟朝享從之

禮部太常寺言將來明堂大禮依已降旨前一日朝享太廟檢照景德熙豐南郊故事皆在諒闇之中當時親行郊禮除郊廟景靈宮合用樂外所有鹵簿鼓吹及樓前宮架諸軍音樂皆備而不作其逐處巡警場止鳴金鉦鼓角而已今臣僚欲議罷宗祀奏樂受胙故事即無去奏樂受胙之文兼祖宗故事三載大饗明堂蓋亦為民祈福奏樂受胙合依祖宗累朝已行故事從之

先是監察御史趙渙言春秋有事於武宮叔弓卒去

樂卒事以卿佐之喪而猶去樂況天王后之喪而可用備樂乎載祀既殯既葬而祭五祀則尸入三飯不侑不酢以五祀之祭猶廢侑酢況宗廟之祭而可享受福釐乎故晉制國有大喪天地明堂皆去聲樂且不受胙有唐祭日遇忌亦備樂而不奏此皆得禮之體也陛下雖在喪服而猶宗祀者用王制之言不敢以卑廢尊也今唯聲樂受胙於未安者蓋拜跪受釐既為嘉慶之事而虞祔既畢則廟加先帝之座陛下

薦裸饋奠進詣徽室必將想像平生悲哀感愴而乃金石絲竹雜然並奏豈不違神靈之至意而傷陛下之孝心哉將來明堂大禮前一日乞依列聖故事躬詣宗廟行朝享之禮其奏樂受胙二事乞寢庶合禮有旨令本部太常寺討論故事

紹興三十二年六月

時孝宗已即位

禮部太常寺言皇帝登極

擇日詣太廟行朝享之禮參酌紹興十三年親享禮例牲牢禮料酒齊等並如每歲五享施行從之

淳熙十六年二月光宗受禪詔以四月六日親享太廟

紹熙五年閏十月

時寧宗已即位

浙東提舉李大性言竊觀紹

興七年侍從臺諫禮官詳定明堂典禮其大畧云居喪  
皆得見宗廟近者合宮展祀陛下止詣明堂殿然臣之  
愚竊謂與淳熙十五年事體不同又況漢文以來皆即  
位而謁廟陛下龍飛已三越月未嘗一至宗廟行禮鑾  
輿屢出過太廟門不入揆之人情似為闕典乞與二三  
大臣議之早行擇日恭謝太廟少見祇肅宗廟之意於

是詔遵用三年之制其朝謁太廟委有妨礙

明年吏部員外郎李謙言事莫重於登極禮莫急於告廟蓋即位必告廟示敬親也告廟必於歲首大其事也舜正月上日受命於文祖禹正月朔旦受命於神宗皆行告廟之禮也然禮以變而或殊事隨時而亦異有不可以一例觀者議禮之家各持一說不致其辯禮意無自而明夫嘉禮之與凶禮不可以並行舉一必廢一故在禮經喪三年不祭唯祭天地社稷

為越紼而行事蓋不敢以卑而廢尊也夫天地以尊而不廢宗廟以親豈獨可廢乎況王制三年不祭之說諸儒之論亦自不同杜預之說以為既祔以後宗廟得四時常祭蓋杜氏之意不以三年不祭宗廟為是也今姑置常祭之說而論即位踰年告廟之禮庶幾禮簡而易明虛言無證則論不定請質事以明之且太甲之元祀十有二月乙丑伊尹奉嗣王祗見厥祖百官猶總已以聽冢宰則是太甲居仲壬之喪而

告廟也漢呂后以八年七月即世九月大臣迎立代  
王元年十月辛亥文帝即祚謁高廟即是文帝居呂  
后之喪而告廟也唐代宗以大厯十四年即世德宗  
建中元年正月庚午朝享於太廟其後穆宗長慶之  
元年敬宗寶厯之元年武宗會昌之元年懿宗咸通  
之元年皆以正月朝享於太廟徧觀歷代之制雖小  
節不同大槩居喪雖權住祭踰年正月必告於廟載  
諸經史可考而知漢昭宣元成哀平六世皆以即位



謁廟不待踰年則失之速唐太宗貞觀三年正月方  
事於太廟馬周得以為言則失之緩皆非禮之正也  
以歷代之事而求其當其惟踰年正月告廟乎恭惟  
陛下自登極以來已享帝矣大行梓宮發引在即來  
年正月盍行告廟之禮禮官未見申明者豈非以王  
制為據乎竊謂即位之後已曾謁廟國有大故故可  
以未祭與居喪之後即位未經謁廟者事體不同考  
歷代已行之事宜於來年正月一日陛下躬行告廟

之禮庶幾立一王之制示萬世之規乞下禮官指定施行詔令禮部太常寺討論聞奏至是禮寺看詳乞俟皇帝從吉日討論典禮施行從之

禮部太常寺修立郊祀大禮前一日朝享太廟行禮儀注

陳設

前享三日儀鑾司設大次於太廟東神門外道北南向小次於阼階東稍南西向又設文武侍臣次於大次之

前行事助祭官宗室及有司次於廟之内外設東方南

方客使次於文官之後西方北方客使次於武官之後

各隨地之宜設饌幔於南神門外

每室饌幔各一

又設七祀次

於殿下橫街之北道西東向又設配享功臣次於殿下

橫街之南東西相向

每室功臣配享各為一次

前享二日宮闈令帥

其屬掃除廟之内外開瘞坎於殿西階之東南方深取

足容物南出陞太常設七祀燎柴於南神門外光祿牽

牲詣所太常陳登歌之樂於殿上前楹間稍南北向設

宮架於庭中立舞表於鄼綴之間戶部陳諸州歲貢於  
宮架之南神門外隨地之宜東西相向前享一日奉禮  
郎禮直官設皇帝版位於阼階上飲福位於東序俱西  
向贊者設亞終獻位於小次南稍東助祭親王宗室使  
相在其南進幣爵酒官受爵酒宮奉幣官薦牛俎官薦  
羊俎官實鑊水官薦豕俎官增沃鑊水官受幣官盥洗  
奉爵官奉瓚槃官進搏黍官舉冊官七祀獻官在助祭  
宗室使相之南並西向北上大禮使位於西階之西稍

南

與亞終  
獻相對

行事光祿卿讀冊官光祿丞功臣南官在其

西

太常光祿以  
下皆稍却

執事官位於其後助祭宰相使相位在

大禮使之南執政官在其西又設監察御史位二於西

階下俱東向北上奉禮郎太祝太官令於東階下西向

北上協律郎位二一於殿上磬簾西北一於宮架西北

俱東向押樂太常丞於登歌樂簾北押樂太常卿宮架

之北北向良醞令位於罇彝所俱北向薦香燈官宮闈

令於室內北向西上又設助祭文武羣臣宗室位於橫

街之南東西相向諸方客位廟門之外隨其方國光祿  
陳牲於東神門外當門西向以南為上祝史各位於牲  
後太常設省牲位於牲西大禮使進幣爵酒官受爵酒  
官奉幣官受幣官盥洗奉爵官奉瓚槃官位於道南北  
向西上七祀配享功臣獻官在其後監察御史二位在  
西東向薦牛俎官眡滌濯官實鑊水官眡腥熟節官增  
沃鑊水官押樂太常卿光祿卿讀冊舉冊官太常丞光  
祿丞奉禮協律郎太祝太官宮闈令位在東西向北上

禮部帥其屬設祝冊案於室戶外之右司罇彝帥其屬設幣篚於酌罇所次設籩豆簠簋之位每室左二十有六籩右二十有六豆俱為四行俎三二在籩前一在豆前又設俎九在豆右為三重登一在籩豆間鉶三皆有柶在登前簠八簋八在籩豆外三俎間簠在左簋在右設爐炭於室戶外蕭蒿稷黍於其後又設毛血盤肝骨豆於室戶外之左稍前設罇彝之位每室羊羹一黃羹一皆有舟著罇二壺罇二皆疊加勺幕為酌罇太罇二

山罇二犧罇二皆有壘加勺加簠設而不酌俱北向西

上太常設七祀位於殿下橫街之北次內

司命戶竈中雷門厲行

又設配享功臣位於橫街之南次內

韓王趙普濟陽王曹彬位於橫街之

南道西東向太師薛居正太師石熙載鄭王潘美位在其西太師李沆太師王旦太師李繼隆位又在其西太師王曾呂夷簡侍中曹瑋位又於其西又設司徒韓琦太師曾公亮位於橫街之南道東西向太師富弼位在其東太師司馬光位又在其東太師韓忠彥位又在其東俱北上

皆設神席太廟設神

位版於座首司罇彝設祭器每左二簋右二豆俎一在

簋豆前簋一簋一在俎前簋在左簋在右爵一次之象



罇一在籩前加纂又設俎三於南神門外每室饌幔內  
設進盤匝帨巾內侍位於皇帝版位之後分左右奉盤  
者北向奉匝及執巾者南向又設亞終獻盥洗爵洗於  
其位之北

盥洗在東  
爵洗在西

罍在洗東加勺篚在洗西南肆實

以巾若爵洗之篚則又實以爵太官令盥洗於西階下

七祀配享功臣獻官盥洗各於神位之前

七祀及配享  
功臣位前盥

洗各一罍勺篚巾各設於左右執罍篚者位其後享日未

行事前宮闈令開室帥其屬整拂神幄如常儀司罇彝

入設祭器太府卿帥其屬入陳幣於篚

幣以白

光祿卿帥

其屬入實籩豆簋簠籩籩四行以右為上第一行餽餌在

前粉飡次之第二行麇在前黃白黑形鹽膾鮑魚鱠次

之第三行乾棗在前濕棗栗濕桃乾桃濕梅乾榛榛實

又次之第四行菱在前芡桌鹿脯次之豆四行以左為

上第一行醢食在前糝食次之第二行韭菹在前醢醢

昌本麇藟菁菹鹿藟茆菹麇藟又次之第三行葵菹在

前羸醢脾析鹿醢蜃蚳醢豚拍魚醢又次之第四行芹

菹在前兔醢深蒲醢醢治菹鴈醢荀菹魚醢又次之簋  
實以稻粱粱在稻前簋實以黍稷稷在黍前登實以太

羹鉶實以和羹芼滑太官令帥其屬入實俎

遵前之俎  
為二重以

北為上第一重實以牛羊七體兩髀兩脅并脊而兩髀  
在兩端兩肩兩脅次之脊在中第二重實以羊腥七體  
其載如牛豆前之俎實以豕腥七體其載如羊豆右之  
俎九為三重以北為上第一重實以牛羊豕首各一第  
二重實以牛腥腸胃肺離在上端剉肺三次之腸三胃  
三又次之一實以羊腥腸胃肺其載如牛一實以豕腥  
膚九橫載第三重一實以牛熟腸胃肺一實以羊熟腸  
胃肺一實以豕熟膚其載如腥皆牛在左羊在中豕在  
右良醢令帥其屬入實俎及罇壘竿俎實以明水黃俎

實以鬱鬯

著樽二一實以玄酒一實醴齊皇帝酌之壺樽二一實玄酒一實盎齊亞終獻酌之太樽

二一實泛齊一實醴齊山樽二一實盎齊一實醴齊犧樽二一實沈齊一實事酒象樽二一實昔酒一實清酒

並設而不酌

凡壘之實各視其樽

又實七祀及配享功臣位禮饌

每位左二邊桌在前鹿脯次之右二豆菁菹在前鹿鸛次之俎實以羊豕脰肉簋實以稷簋實以黍爵一象樽一實以清酒太常設燭於神位前設大禮使以下行事執事

官揖位於東神門外如省牲之位設望瘞位於瘞坎之南如省饌之位儀鑾司設冊幄於南神門外隨地之宜前朝享一日學士院以祝冊授通進司進御書訖降赴

尚書禮部

車駕詣太廟

前享一日皇帝於景靈宮朝獻畢既還大次禮部郎中  
奏解嚴訖皇帝入齋殿文武侍祠行事執事助祭之官  
非從駕者宗室先詣太廟祠所其日禮直官宣贊舍人引禮

部侍郎詣大次前奏請中嚴少頃又奏外辦皇帝服履  
袍自齋殿詣大次出行門禁衛諸班親從等諸司祇應  
人員以下迎駕奏聖躬萬福次知客省事以下樞密都

承旨以下知內侍省以下帶御器械官應奉祇應通侍  
大夫以下武功大夫以下及幹辦庫務文臣一班迎駕  
奏聖躬萬福俟皇帝即御座從駕宰執使相一班次管  
軍臣寮並奏聖躬萬福皇帝乘輿出景靈宮櫺星門將  
至太廟御史臺太常寺閣門分引文武侍祠行事執事  
助祭之官宗室於太廟櫺星門外立橫班再拜奏迎訖  
退皇帝乘輿入櫺星門至大次降輿以入簾降侍衛如  
常儀宣贊舍人承旨敕羣臣及還次

# 省牲器

是日未後二刻宮闈令帥其屬掃除廟之内外司鐸彝帥執事者以祭器入設於位凡祭器皆藉以席又加巾

蓋太府卿入陳幣於篚

告潔畢  
權微

未後三刻禮直官贊者

分引大禮使以下並服常服詣東神門外省牲位光祿卿丞與執事者牽牲就位禮直官贊揖贊者引押樂太

常卿入行樂架

凡亞終獻行事皆禮直官太常博士引大禮使執政官及申祇滌濯官受爵酒

官進爵官行事皆禮直官引餘官皆贊者引次引祇滌濯官及升自西階祇滌濯凡行事執事官升降皆自西

階內應奉官并執事隨應奉人各隨應奉階升降

次引申視滌濯官申視滌濯

執事者皆舉冪曰潔俱退復位禮直官稍前曰告潔畢

請省牲前引省牲官稍前省牲訖退復位次引光祿卿

出班巡牲一匝西向躬曰充曰備次引光祿丞出班巡

牲一匝西向躬曰脂俱復位禮直官稍前曰省牲訖請

就省饌位揖訖引大禮使以下各就位禮直官贊揖有

司省饌俱畢禮直官贊省牲畢揖訖俱還齋所光祿卿

丞及執事者以次牽牲詣厨授太官令次引省鼎鑊官



詣厨省鼎鑊視濯漑次引實鑊水官詣厨實鑊水次引  
增沃鑊水官詣厨增沃鑊水協律郎展視樂器乃還齋  
所晡後一刻太官令帥宰人以鸞刀割牲祝史各取毛  
血實於槃又取脾膋實於登俱置饌所遂烹牲宮闈令  
帥其屬掃除廟之內外

晨裸

享日丑前五刻

行事用丑時十刻

宮闈令開室帥其屬掃除禮

部奠冊於案太府卿入陳幣光祿卿入實籩豆簋簋太

官令入實俎良醢令入實羹及罇罍樂工帥工人二舞  
以次入與執罇罍篚幕者各就位執事官各入就位次  
御史臺太常寺閤門宣贊舍人分引文武助祭官及宗  
室客使贊者引薦羊俎官以下宗室各入就位禮直官  
贊者分引大禮使以下行事執事官詣廟東門外揖位  
立禮直官贊揖訖先引監察御史按視殿之上下糾察  
不如儀者降階就位次引大禮使以下各入就位皇帝  
服通天冠絳紗袍至大次禮儀使樞密院官太常卿閤

門官太常博士禮直官分立於大次外之左右引禮部侍郎詣次前奏請中嚴少頃又奏外辦符寶郎奉寶陳於宮架之側隨地之宜禮儀使當次前俛伏跪奏禮儀使臣某言請皇帝行事奏請俛伏興還侍立

禮儀使奏祀儀准此

簾捲皇帝服衮冕以出侍衛如常儀禮儀使以下前導

至東神門外殿中監跪進大圭禮儀使奏請執大圭前

導皇帝入自正門

侍御不應入者止於門外

協律郎跪俛伏舉麾興

工鼓祝宮架乾安之樂作

皇帝升降行止皆奏乾安之樂

至阼階下偃

麾戛敔樂止升自阼階大禮使從

凡樂皆協律郎跪俛伏舉麾興工鼓祝而

後作偃麾戛敔而後止升自阼階皇帝升降大禮使皆從左右侍衛之官量人數從升

登歌樂作

樂止禮儀使以下分左右侍立

凡行禮禮儀使樞密院官太常卿閤門官太常

博士禮直官前導至位則分立於左右

次引奉瓚官升詣僖祖室神位前

西向立奉瓚樂官升詣皇帝版位前奉瓚樂北向立次

引奉神主官詣皇帝版位前俛伏跪奏奉神主奏訖俛

伏興退祠祭官於殿上承傳曰奉神主次引薦香燈官

搢笏於祔室內奉帝尊主設於座

奉神主詣神幄內於几後啟匱設於座及

以白羅巾覆之  
執笏退復位

次引宮闈令奉后神主如上儀

以青羅巾覆之

退復位次引奏奉神主官詣皇帝版位前伏跪奏奉神主訖奏訖俛伏興退禮儀使前奏有司謹具請行事又奏請再拜皇帝再拜贊曰再拜在位官皆再拜訖次內侍各執槃匱帨巾以進宮架樂作禮儀使奏請皇帝搢大圭盥手內侍進槃匱沃水皇帝盥手又奏請帨手內侍進巾皇帝悅手訖又奏請皇帝洗瓚奉瓚槃官進瓚內侍沃水皇帝洗瓚又奏請拭瓚內侍進巾皇帝拭瓚

訖樂止又奏請執大圭奉瓚槃官奉瓚槃詣僖祖室罇  
彝所西向立以瓚涑鬯執彝者舉冪良醢令酌鬱鬯訖  
先詣次室罇彝所北向立禮儀使前導登歌樂作皇帝  
入詣僖祖室北向立樂止禮儀使奏請搢大圭跪奉瓚  
槃官奉瓚槃西向以瓚授奉瓚官奉瓚官西向跪以進  
禮儀使奏請執瓚皇帝執瓚以鬯裸地奠瓚奉瓚官受  
瓚以授奉瓚槃官奉瓚槃官以槃受瓚訖俱詣次室以  
俟禮儀使奏請執大圭俛伏興前導皇帝出戶外北向

立又奏請再拜皇帝再拜訖禮儀使前導皇帝詣翼祖  
室次詣宣祖室次詣太祖室次詣太宗室次詣真宗室  
次詣仁宗室次詣英宗室次詣神宗室次詣哲宗室次  
詣徽宗室裸鬯並如上儀奉瓚官奉瓚槃官俱降復位  
良醞令還罇所禮儀使前導皇帝還版位登歌樂作至  
位西向立樂止宮架作興安之樂文德之舞九成止太  
官令取肝以鸞刀制之洗於鬱鬯貫之以骨燎於爐炭  
薦香燈官以肝骨入詔神於室又出以隳祭於室戶之

左三祭於茅苴俱降詣盥洗位盥手悅手升復執事位

饋饌

享日有司陳鼎三十有三於神厨各在鑊右太官令帥

進饌者詣厨以七升牛於鑊實於一鼎

肩臂臠肫脰正脊一直脊一橫

脊一長脊一短脊一代脊一背二骨以正

次升羊如牛升豕如羊各實於一

鼎

每室牛豕各一鼎

皆設扃幕祝史對舉入設於每室饌幔內

次引視腥熟節官詣饌所視腥熟之節俟皇帝晨裸畢還位樂止祝史抽扃委於鼎右除幕加匕畢於鼎太官



令以七升牛載於一俎

肩臂臑在上端肫脰在下端脊脅在中

次升羊豕

各載於俎其載如牛

每室牛羊豕各一俎

次引薦牛薦羊薦豕俎

官搢笏奉俎以入太官令引入正門宮架豐安之樂作

由宮架東至橫街折方進行陳於西階下北向北上薦

俎官搢笏奉俎以升執事者各迎於階薦官奉俎詣僖

祖室神位前北向跪奠先薦牛次薦羊次薦豕各執笏

俛伏興有司設牛羊豕俎於腸胃膚之前

牛在左羊在前豕在右

詣次室奉奠並如上儀樂止俱降復位

內執官降西側階出西神門入

南門歸  
執事班

次引薦香燈官取蕭合黍稷擣於脂燎於爐炭

又當饋熟之時取菹擣於醢祭於豆間三又取黍稷肺  
祭如初藉用茅各還罇所次引奉幣官進幣官受幣官  
受爵酒官進爵酒官升詣僖祖室奉幣官進幣官受爵  
酒官進爵酒官在東西向北上受幣官在西東向次引  
奉爵酒官升殿詣皇帝版位前奉爵北向立內侍各執  
盤匱悅巾以進宮架樂作禮儀使奏請皇帝搢大圭盥  
手內侍進槃匱沃水皇帝盥手又奏請悅手內侍進巾

皇帝悅手訖又奏請皇帝洗爵奉爵酒官進爵內侍沃  
水皇帝洗爵又奏請拭爵內侍進巾皇帝拭爵訖樂止  
又奏請執大圭奉爵酒官受爵奉受爵詣僖祖室酌罇  
所西向立執罇者舉冪良醞令酌著罇之醴齊訖先詣  
次室酌罇所北向立禮儀使前導登歌樂作殿中監進  
跪進鎮圭禮儀使奏請搢大圭執鎮圭前導皇帝入詣  
僖祖室樂止宮架作基命之樂

翼祖室大順之樂宣祖  
室天立之樂太祖室皇

武之樂太宗室大定之樂真宗室熙大之樂仁宗室美  
成之樂英宗室治隆之樂神宗室大明之樂哲宗室重

光之樂徽宗  
室承元之樂

文舞作內侍先設繅藉於地禮儀使奏請

跪奠鎮圭於繅藉執大圭俛伏興又奏請搢大圭跪次  
內侍跪取幣於篚以授奉幣官奉幣官授進幣官進幣  
官西向跪以進禮儀使奏請受幣皇帝受奠訖受幣官  
東向跪受以興進奠於僖祖神位前次奉爵官以爵授  
受爵酒官受爵酒官授進爵酒官進爵酒官西向跪以  
進禮儀使奏請執爵皇帝執爵祭酒  
三祭於茅道奠爵受爵  
官以爵復於坫禮儀使奏請執大圭俛伏興前導皇帝

出戶外北向又奏請少立樂止奉幣官進幣官受幣官  
奉爵酒官受爵酒官進爵酒官俱詣次室內侍舉鎮圭  
授殿中監又以纁藉詣次室先設於地次舉冊官搢笏  
跪舉祝冊讀祝官搢笏東向跪讀冊文讀訖奠冊各執  
笏興先詣次室戶外東向立禮儀使奏請再拜皇帝再  
拜訖禮儀使前導皇帝詣每室奠圭幣酌獻並如上儀  
次奉幣官進幣官受幣官奉爵酒官受爵酒官進爵酒  
官俱降復位內侍舉鎮圭纁藉以鎮圭授殿中監以授

有司讀冊官以下俱降復位禮儀使前導皇帝還版位  
登歌樂作至位西向立樂止禮儀使奏請還小次登歌  
樂作前導皇帝降自阼階樂止宮架樂作將至小次禮  
儀使奏請釋大圭殿中監跪受大圭皇帝入小次簾降  
樂止文舞退武舞進宮架正安之樂作舞者立定樂止

亞終獻

禮直官太常博士引亞獻詣盥洗位北向立搢笏盥手  
執笏詣爵洗位北向立搢笏洗爵拭手以爵授執事者

執笏升詣僖祖室酌罇所西向立宮架作正安之樂武功之舞執事者以爵授亞獻亞獻搢笏跪執爵執罇者舉罇太官令酌壺罇之盎齊訖先詣次室酌罇所北向立亞獻以爵授執事者執笏興入詣僖祖室神御前北向立搢笏跪執事者以爵授亞獻亞獻執爵祭酒三祭於茅道奠爵執笏俛伏興出戶外北向再拜次詣每室酌獻並如上儀樂止降復位初亞獻行禮將畢禮直官太常博士引終獻詣洗及升殿酌獻並如亞獻之儀降

復位初終獻既升次引七祀及配享功臣獻官詣盥洗  
位搯笏盥手悅手執笏詣神位前搯笏跪執爵三祭酒  
奠酌執笏俛伏興再拜詣次位並如上儀退復位唯七祀先  
詣司命立奠爵訖興少立次引太祝進詣  
位前北向跪讀祝文訖退獻官再拜復位

### 皇帝飲福

初皇帝既晨裸光祿以牛左臂一骨及長脅短脅俱二  
骨以並載於胙俎升設於僖祖室戶外俟終獻既升獻  
次引進俎官搏黍太祝太官令詣飲福位北向立奉俎



豆爵酒者各立於其後禮儀使奏請詣飲福位簾捲出  
次宮架樂作殿中監跪進大圭禮儀使奏請執大圭前  
導皇帝至阼階下樂止升自阼階登歌樂作將至飲福  
位樂止登歌僖安之樂作皇帝至飲福位西向立尚醢  
奉御執罇詣酌罇所良醢令酌上罇福酒合置一罇尚  
醢奉御奉罇詣飲福位殿中監奉爵尚醢奉御酌福酒  
殿中監北向捧以立禮儀使奏請再拜皇帝再拜殿中  
監跪以爵酒進禮儀使奏請搢大圭跪受爵祭酒

三祭  
於地

啐酒奠爵殿中監跪受爵以興太祝帥執事者持胙俎  
進減神位前正脊二骨橫脊加於俎上內侍受俎以授  
進俎官進俎官南向跪以進皇帝受俎奠之進俎官受  
俎以興以授內侍退詣殿上稍西東向立太官令取黍  
於簋搏以授搏黍太祝太祝受以豆北向跪以進皇帝  
受訖奠之搏黍太祝受豆以興降復位次殿中監再跪  
以爵酒進禮儀使奏請再受爵飲福酒奠爵殿中監受  
虛爵興以授奉御執事者俱降復位禮儀使奏請執大

主俛伏興又奏請再拜皇帝再拜樂止禮儀使前導皇帝還版位登歌樂作至版位西向立樂止次引徹牛俎徹豆及俎豆俎各一但少移故處登歌豐安之樂作卒徹樂止徹牛俎官降復位禮直官曰賜胙行事助祭官拜贊者承傳曰賜胙再拜在位官皆再拜送神宮架興安之樂作一成止

### 神主入室

次引奏奉神主官詣皇帝版位前俛伏跪奏奉神主入

室奏訖俛伏興退祠祭官於殿上承傳曰奉神主入室

次引薦香燈官搢笏奉帝主入祔室訖

薦香燈官先捧匱於神座納神

主於匱訖

捧入祔室執笏退復位次引宮闈令奉后主如上儀退

復位次引奏神主官詣皇帝版位前俛伏跪奏奉神主

入室訖俛伏興退禮儀使奏禮畢前導皇帝降自阼階

登歌樂作至阼階下樂止宮架樂作出門樂止禮儀使

奏請釋大主殿中監跪受大主以授有司皇帝還大次

禮部郎中奏請解嚴訖皇帝入齋殿宮闈令以黍稷肺

祭藉用白茅束而埋之於西階東有司各取幣置於坎  
大禮使以下就望座位禮直官曰可瘞寘土半坎太廟  
宮闈令監視次引大禮使以下詣東神門外揖位立禮  
直官贊禮畢揖訖退文武助祭官及宗室以次出次引  
七祀獻官詣南神門外七祀望燎位南向立有司置祝  
版於燎柴焚訖退太官令帥其屬徹禮饌監察御史詣  
殿監視收徹訖宮闈令闔戶以降乃退太常藏祝冊於

匱



文獻通考卷九十八



總校官庶吉士臣張能照

校對官檢討臣盧應

膳錄監生臣呂永安

欽定四庫全書薈要

史部

文獻通考卷九十九

詳校官員外郎臣潘紹觀





欽定四庫全書薈要卷九千四百十九

史部

文獻通考卷九十九

鄱陽馬端臨貴與著

宗廟考九

祭祀時享

親饗太廟別廟行禮儀注

誓戒

如紹興修立郊祀誓戒儀注惟不置郊社令誓文曰今

年七月十四皇帝為登寶位親行朝享太廟別廟各揚其職其或不恭國有常刑

致齋

皇帝散齋七日於別殿致齋三日於齋殿至行禮日自齋殿詣太廟餘如郊祀儀注

陳設

並同郊祀前一日朝享太廟禮惟不設四方客使次及陳諸州歲貢并實俎不以牛止用羊豕

省牲器

儀注如紹興十三年親享唯舊用未後二刻掃除廟內  
外陳設祭器幣篚三刻省牲饌鼎鑊樂器等今用其日  
質明

車駕自齋殿詣太廟

其日文武侍祠行事執事助祭官宗室先詣太廟祠所  
其從駕臣僚並服常服就次有司進輦於齋殿其從駕  
臣僚並俟從駕次禮直官宣贊舍人引禮部侍郎奏請

中嚴少頃又奏外辦皇帝自內服履袍詣齋殿即御座

鳴鞭行門禁衛諸班親從等諸司祇應人員以下各自

贊常起居次知客省事以下樞密都承旨以下入內內

侍省都知以下帶御器械官應奉祇應通侍大夫以下

武功大夫以下及幹辦庫務文臣一班常起居宣贊舍

人贊從駕臣僚並常起居

凡起居者止  
奏聖躬萬福

次管軍臣僚並

常起居該宣名即宣名

若得旨免起居  
更不起居

皇帝乘輦降自西

階稱警蹕侍衛如常儀出和寧門將至太廟御史臺閣

門分引文武助祭官宗室禮直官贊者引行事執事官俱詣廟櫺星門外立班再拜奉迎訖退

內已奏起居止奏聖躬萬福

皇帝乘輦入櫺星門至大次侍衛如常儀皇帝降輦入大次簾降舍人承旨敕羣官各還次以俟立班行禮

### 晨裸

並同郊祀前朝享太廟禮但諸帝室既裸鬯後禮儀使引皇帝至別廟后室前裸鬯如上儀

### 饋食

並同郊祀前朝享太廟禮惟無牛鼎俎

亞終獻

皇帝飲福

神主入室

並同紹興十三年儀注唯飲福不用牛俎

車駕還內

臣僚禁衛等起居迎駕奏聖躬萬福訖以俟從駕還內  
並如來儀禮部郎中奏解嚴宣贊舍人承旨敕羣官各

還次將士各還其所

太廟時享儀注

時日

太常寺預於隔季以孟春擇日享太廟別廟闕太史局

孟夏孟秋孟冬並准此若臘享則預於隔季以季冬臘日享太廟別廟

太史局擇日報太

常寺

臘享則以其日報太常寺

太常寺參酌訖具時告散官

齋戒

前享十日受誓戒於尚書省其日五鼓贊者設位版於

都堂下初獻官在左刑部尚書在右並南向亞終獻位

於其南稍東北向西上

若冬享臘享則又設禮官位於終獻之東其揖位省牲位省饌

此位准

監察御史位於其西稍北東向兵部工部尚書押

樂太常卿光祿卿押樂太常丞光祿丞位於其南稍西

北向東上

凡設太常丞光祿丞位皆稍却

奉禮協律郎太祝太官宮闈

令位於其東西向北上捧俎官薦香燈官位其後贊明

贊者引行事執事官就位立定禮直官引初獻降階就

位禮直官贊揖在位者對揖初獻搢笏讀誓文云某月



某日孟春薦享太廟別廟

夏云孟夏秋云孟秋冬云孟冬臘享云季冬臘享

各

揚其職不共其事國有常刑讀訖執笏禮直官贊奉禮

協律郎太祝太官宮闈令以下先退餘官對拜乃退散

齋七日治事如故宿於正寢不弔喪問疾作樂判書刑

殺文書決罰罪人及與穢惡致齋三日

光祿卿丞太官令齋一日

二

日於本司

宗室於睦親宅都廳如相妨即於宗學餘官無本司者並於太廟齋坊質明至齋所

唯

享事得行其餘悉禁前享一日質明俱赴祠所齋宮官

給酒饌享官已齋而闕者通攝行事

# 陳設

前享三日儀鸞司設饌幔於東神門外別廟於本廟

每室

饌幔各一若冬享則設配享功臣次於殿下橫街之南東西相向每室配享功臣各為一次若臘享則設七祀次一於橫街之北道西東向前二日有司牽牲詣祠所前一日宮闈

令帥其屬掃除廟之内外太常設祭器

凡設祭器皆藉以席籩豆又加

巾

以俟告潔

既畢權徹

有司陳牲於東神門外當門西向祝

史各位於牲後太常設省位於牲西三獻官在道南北向兵部工部尚書押樂太常卿光祿卿押樂太常丞光

祿丞奉禮協律郎太祝太官宮闈令在道北南向俱西

上

凡設押樂太常丞以下位皆稍却若享日則不設光祿卿丞宮闈令位

監察御史於兵

部尚書之西少北太常陳禮饌於東神門外却東道北南向設省饌位版於禮饌之南三獻官在南北向西上監察御史在西東向兵部尚書押樂太常卿光祿卿押樂太常丞光祿丞奉禮協律郎太祝太官宮闈令在東西向北上捧俎官薦香燈官在其後太常設登歌之樂於太廟別廟殿上前楹間却南北向設宮架於太廟庭

中立舞表於鄼綴之間享日丑前五刻禮直官贊者諸  
司職掌各服其事宮闈令入殿開室整拂神幄帥其屬  
掃除鋪筵在室內北墉下南向几在筵上如常儀太常  
陳幣篚各於神位前之左幣以白一祝版各於神位之右置

於坵次祭器實之每室左二十有六籩為四行以右為

上右二十有六豆為四行以左為上俎二一在籩前實以

羊腥七體一在豆前實以豕腥七體其載如羊又俎六在豆右為三重以

北為上第一重實以羊豕首各一第二重實以羊腥腸胃肺离肺一在上端判肺三次之腸三胃三又

次之一實以豕腥膚九橫載第三重一實以羊熟腸  
胃肺一實以豕熟膚其載如腥皆羊在左豕在右 登

一在籩豆間

實以太羹

銅三在登前

實以羹加筆滑

簋八簋八在籩

豆外二俎間簋在左簋在右

簋實以稻梁梁在稻前  
簋實以黍稷稷在黍前

登

一在籩之左

實以肝膏

槃一在室戶外稍東

實以毛血

爐炭於室

戶外之左稍前置蕭蒿於筐設罇壘於殿上為二重著

罇二加勺罇為上罇

一實玄酒一實醴齊初獻酌之

壺罇二加勺罇

實一

玄酒一實盎齊

春夏設雞羹一并舟在著罇之右

實以鬱鬯

亞終獻酌之

初獻酌之秋冬臘享則設葷羹

加勺罇又設鳥羹一并丹在著壘之右

實以明水秋冬

臘享則設黃羹

太罇二

一實泛齊  
一實醴齊

山罇二

一實盎齊  
一實醢齊

犧

罇二

一實沈齊  
一實事酒

象罇二

一實昔酒  
一實清酒

罍皆實以明水俱北

向西上皆加罍設而不酌爵站三在罇之前太常設燭

於神位前

若冬享設配享功臣位於殿下橫街之南次  
內若臘享則設七祀司命戶竈中雷門厲行

於橫街之上次內皆太常設神位席  
本廟設神位版太常設祭器實之

又設俎二於東神

門外每室饌幔內洗二於東階下直東雷北向

盥洗在  
東爵洗

在壘在洗東加勺篚在洗西南肆實以巾

若爵洗之篚  
則又實以珪

贊及別廟則  
實以璋贊

執壘篚者位其後

若冬臘二享則又設禮  
官盥洗一於從祀神位

前又設揖位於東神門外如省牲位

唯不設光祿卿丞捧俎官薦香燈官

宮闈令位

開瘞坎於太廟別廟殿西階之東方深取足容物

南出陛設望瘞位於太廟瘞坎之南如省饌之位

唯不設光

祿卿丞太官令捧俎官薦香燈官宮闈令若臘享則積七祀燎柴於西神門外

又設三獻官席

位於殿下東階之東南西向南立

若冬享臘享則又設禮官位於終獻之北

兵部工部尚書於其南西向北上監察御史押樂太常

丞席位於殿庭之南北向奉禮協律郎太祝太官令位

其後俱西上光祿卿席位於監察御史之東北向又設

監察御史位於殿上前楹西架東向奉禮郎太祝在東  
西向北上押樂太常丞於樂廡之北太官令於酌罇所  
俱北向協律郎位二一於太廟殿上前楹間稍西一於  
宮架西北俱東向押樂太常卿位於宮架北北向

省牲器

同郊祀前朝享太廟禮

晨裸

享日丑前五刻

行事春冬用丑時七刻夏秋用丑時一刻

祠祭官引宮闈令



入詣殿庭北向立祠祭官曰再拜宮闈令再拜升殿開

室整拂神幄帥其屬掃除退就執事位次引薦香燈官

入詣殿庭北向立

凡宮闈令薦香燈捧俎官行事皆祠祭官引

祠祭官曰再

拜薦香燈官再拜升殿各就執事位次樂正帥工人二

舞入就位

太廟別廟登歌工人俟監察御史點閱訖升西階各就位

次太官令光祿

丞帥其屬實饌具畢光祿丞還齋所次引光祿卿入詣

殿庭席位北向立贊者曰再拜光祿卿再拜升殿點視

禮饌畢次引監察御史升殿點閱陳設糾察不如儀者

凡黜視及黜閤皆先詣僖  
祖室以至次室及別廟

光祿卿還齋所餘官各服祭

服次引行事執事官詣東神門外揖位立定禮直官贊

揖次引押樂太常卿太常丞協律郎次引監察御史奉

禮郎太祝太官令入就殿下席位北向立次引初獻兵

部工部尚書亞終獻入就殿下席位西向立

若冬享臘  
享則引禮

官祠祭官於殿上贊奉神主次引薦香燈官入室揖笏

於祔室內奉帝主設於座

奉神主詣神幄內於几後啟  
匱設於座以白羅巾覆之

執笏退復執事位次引宮闈令奉后主奉別廟宮闈令

奉后主如上儀

以青羅巾覆之

退復執事位祠祭官於殿上贊

奉神主訖禮直官稍前贊有司謹具請行事贊者曰再

拜在位者皆再拜次引監察御史押樂太常卿太常丞

奉禮協律郎太祝太官令各就位立定

太官令就僖祖位尊羹所

次

引初獻詣盥洗位北向立搢笏盥手悅手執笏詣爵洗

位北向立搢笏洗瓚授執事者執笏升殿詣僖祖室罇

羹所西向立執事者以瓚授初獻初獻搢笏跪執瓚執

羹者舉罇太官令酌鬱鬯訖先詣宣祖室尊羹所北向

初獻以瓚授執事者執笏興詣僖祖室神位前北向立  
搢笏跪次引奉禮郎搢笏西向跪執事者以瓚授奉禮  
郎奉禮郎奉瓚授初獻初獻執瓚以鬯裸地奠訖以瓚  
授執事者次執事者以幣授奉禮郎奉禮郎奉幣授初  
獻執笏興先詣宣祖室神位前西向立初獻受幣奠訖  
執笏俛伏興出戶外北向再拜次詣宣祖室太祖室太  
宗室真宗室仁宗室英宗室神宗室哲宗室徽宗室欽  
宗室次降西側階詣別室升西階詣懿節皇后室安穆

皇后室安恭皇后室裸鬯奠幣並如上儀訖降東側階  
由東廊俱復位立協律郎跪俛伏舉麾興工鼓祝宮架  
作興安之樂孝熙昭德之舞九成偃麾戛鼓樂止

凡樂皆協

律郎跪俛伏舉麾興工鼓祝而後作偃麾戛鼓而後止

既晨裸薦香燈官入取毛

血奠於神座前別廟以太祝太官令取肝以鸞刀制之  
洗於鬱鬯貫之以骨燎於爐炭薦香燈官以肝骨入詔  
神於室別廟以太祝又出以隋祭於室戶外之左三祭  
於茅苴退復位

饋食

享日有司帥進饌者詣厨以匕升羊實於一俎

肩臂臠在上端

肱胛在下端正脊一直脊一橫脊一長脊一短脊一代脊一皆二骨一並在中

次升豕如羊實

於一俎

每室羊豕各一俎

入設於饌幔內俟初獻既升裸訖捧

俎官及執事者捧俎入詣西階下北向北上次引兵部

工部尚書詣西階下搢笏捧俎

兵部奉羊工部奉豕

升殿宮架豐

安之樂作詣僖祖神位前北向跪奠先薦羊次薦豕各

執笏俛伏興有司入設於豆右腸胃膚之前

羊在左豕在右

次

詣每室奉俎並如上儀樂止次詣別廟奠俎如前太廟

之儀

唯登歌作肅安之樂

降東側階由東廊復位初奠俎訖次引

薦香燈官取蕭合黍稷擣於脂燎於爐炭當饋熟之時

薦香燈官取菹擣於醯祭於豆間三又取黍稷肺祭如

初俱藉以茅別廟以太祝退復位次引太祝詣僖祖室

前東向立次引初獻再詣盥洗位宮架正安之樂作

初獻

升降行止皆

作正安之樂

至位北向立搯笏盥手悅手執笏詣爵洗

內北向立搯笏洗爵拭爵以授執事者執笏升殿止登

歌樂作詣僖祖室酌罇所西向立樂止登歌基命之樂  
作執事者以爵授初獻初獻搢笏跪執爵執罇者舉罇  
太官令酌著罇之醴齊訖先詣宣祖室酌罇所北向立  
初獻以爵授執事者執笏興入詣僖祖室神位前北向  
立搢笏執事者以爵授初獻初獻執爵祭酒三祭於茅  
苴奠爵執笏俛伏興出戶北向立樂止次太祝搢笏跪  
讀祝文讀訖執笏興先詣宣祖室戶外東向立初獻再  
拜次詣每室及詣別廟行禮並如上儀

初獻詣別廟升  
降登歌作崇安



之樂酌獻行禮登初獻將降階登歌作降階樂止宮架歌並作歆安之樂

樂作復位樂止文舞退武舞進宮架作正安之樂舞者立定樂止次引亞獻詣盥洗位北向立搢笏盥手悅手執笏詣爵洗位北向立搢笏洗爵拭爵以授執事者執笏升殿詣僖祖室酌罇所西向立宮架作武安之樂禮洽儲祥之舞執事者以爵授亞獻搢笏跪執爵執罇者舉冪太官令酌壺罇之盎齊訖先詣宣祖室酌罇所北向立亞獻以爵授執事者執笏與詣僖祖室神位前北

向立搢笏跪執事者以爵授亞獻亞獻執爵祭酒三祭於茅苴奠爵執笏俛伏興出戶外北向再拜次詣每室

并別廟行禮並如上儀

亞終獻詣別廟酌獻登歌並作嘉安之樂

初亞獻既

入太室引終獻詣洗及升殿行禮並如上獻之儀訖俱

降復位

若冬享則俟終獻將升次引禮官詣盥洗位搢笏盥手悅手執笏詣配享功臣神位前搢笏跪

執爵三祭酒奠爵執笏俛伏興再拜詣次位行禮並如上儀退復位若臘享則俟終獻將升次引禮官詣盥洗位搢笏盥手悅手執笏詣司命神位前搢笏跪執笏三祭酒奠爵執笏俛伏興立次引太祝進詣神位前北向搢笏跪讀祝文讀訖執笏興退復位禮官再拜詣每位前行禮並如分獻配享功臣之儀退復位次引

太祝徹籩豆

籩豆各一  
少移故處

登歌恭安之樂作

別廟寧  
安之樂

卒徹

樂止次引宮闈令束茅訖俱復位禮直官曰賜胙贊者承傳曰賜胙再拜在位者皆再拜送神宮架興安之樂作一成止祠祭官於殿上贊奉神主入祔室次引薦香

燈官搢笏奉帝主入祔室

薦香燈官先捧匱置於神座  
納神主於匱訖捧入祔室

執笏退復位次引宮闈令奉后主并引別廟宮闈令奉后主入祔室並如上儀退復位祠祭官於殿上贊奉神主入祔室訖次引初獻兵部刑部尚書亞終獻就望座

位

若冬享臘享則又引禮官就望瘞位

有司詣室取幣束茅苴於坎次引

監察御史押樂太常丞奉禮協律郎太祝就望瘞位立

定禮直官曰可瘞寘土半坎本廟宮闈令監視

別廟殿下宮闈

令監視

次引初獻以下詣東神門外揖位立禮直官贊禮

畢揖訖退

若臘享則次引禮官詣西神門外七望燎位立有司置祝版於燎柴焚訖退

太官

令帥其屬徹禮饌次引監察御史詣殿監視收徹訖還

齋所宮闈令闔戶以降太常藏祝版於匱光祿卿以昨奉進監察御史就位展視光祿卿望闕再拜乃退

太廟薦新儀注

陳設

前一日有司設新物於太常卿齋所至日以行事設籩

豆於每室戶外以新物實之

每室孟春豆三實以韭封  
卯仲春豆一實以冰季春

豆三實以笋蒲鮪魚蓮一實以含桃孟夏豆三實以菱  
肉大小麥仲夏豆二實以雛雞黍蓮一實以瓜季夏蓮  
二實以菱棗孟冬豆一實以鴈仲冬  
豆一實以麋季冬豆一乃實之以魚又設盥洗於阼階

下直東雷北向罍在洗東加勺篚在洗西南肆實以巾

設太常卿席位於殿下東南西向

省饌

前一日祠祭官引宮闈令詣太常卿齋所同胝新物應饌者有司詣厨省鑊以時帥其屬臨造

行事

薦新日祠祭官引宮闈令先入詣殿庭北向立祠祭官

曰再拜宮闈令再拜升自西階

凡行事執事官升降皆自西階

開室

不出

神主帥其屬掃除退就執事位次有司實新畢禮直官引

太常卿常服入就殿下席位西向立贊再拜太常卿再

拜次引詣盥洗位北向立搢笏盥手悅手執笏升殿詣  
僖祖室戶外搢笏執事者以新物授太常卿太常卿受  
新物奉入詣神位前北向跪奠執笏俛伏興出戶外北  
向再拜次詣宣祖室太祖室太宗室真宗室仁宗室英  
宗室神宗室哲宗室徽宗室欽宗室別廟懿節皇后室  
安穆皇后室安恭皇后室行禮並如上儀降復位少立  
退宮闈令閤戶降退

郊祀大禮前二日朝獻景靈宮行禮儀注

陳設

前朝獻三日儀鸞司設大次於齋殿又設文武侍臣次於大次之前隨地之宜行事助祭官宗室及有司次於宮之内外各隨地之宜設東方南方客使次於文官之後西方北方客使次於武官之後又設饌幔於殿門外隨地之宜前二日郊社令帥其屬掃除宮之内外太常設燎爐於殿門之外又陳登歌之樂於殿上前楹間稍南北向設宮架於殿門外隨地之宜立舞表於鄮綴之



間前朝獻一日奉禮郎禮直官設皇帝版位於阼階上  
西向飲福位於聖像之西南北向望燎位於殿下之東  
南向贊者設亞終獻位於阼階之東稍南西向大禮使  
左僕射於西階之西稍南東向

與亞終獻  
班相對

行事戶部禮

部刑部尚書吏部刑部侍郎光祿卿讀冊官舉冊官光

祿丞於其西

光祿丞  
稍却

執事官位又於其後奉禮郎搏黍

太祝太社太官令位於亞獻之北西向稍却監察御史  
位二於大禮使之北東向俱稍却又設協律郎位二一

於殿上磬虞之西北一於宮架西北俱東向押樂太常  
丞於登歌樂虞北押樂太常卿位於宮架之北良醞令  
於酌罇所俱北向又設文武助祭官宗室位於行事執  
事官之南東西相向諸方客使位於殿門之外隨其方  
國又設告潔位於殿門之外設大禮使左僕射位於道  
西東向行事吏部戶部禮部刑部尚書吏部刑部侍郎  
押樂太常卿光祿卿讀冊官舉冊官押樂太常丞光祿  
丞奉禮協律郎搏黍太祝郊社太官令位於道東西向

北上

押樂太常丞  
以下位稍却

監察御史位於尚書之右異位稍却

光祿陳禮饌於殿門內在北南向太常設省饌位版於  
禮饌之南大禮使左僕射在南北向西上監察御史位  
二在西東向行事吏部戶部禮部刑部尚書吏部刑部  
侍郎押樂太常卿光祿卿讀冊官舉冊官押樂太常丞  
光祿丞奉禮協律郎搏黍太祝郊社太官令在東西向  
北上禮部帥其屬設祝冊案於殿上之西司鐸羹帥其  
屬設玉幣篚於酌罇所次設籩豆簋簋之位於聖像前

左十有一簋右十有一豆俱為三行俎一在簋前簋一  
簋一在簋豆外簋在左簋在右又設罇罍之位著罇二  
壺罇二皆有罍加勺罍為酌罇太罇二山罇二犧罇二  
象罇二皆有罍加罍設而不酌並在殿上稍南北向西  
上又設簋豆簋簋俎各一於饌幔內設御盤匱於阼階  
上并供進盤匱悅巾內侍坐並於皇帝版位之後分左  
右奉盤者北向奉匱及執巾者南向又設亞終獻盥洗爵洗於其位之  
北盥洗在東爵洗在西罍洗在東加勺筐在洗西南肆實以巾若洗

爵之篚則執壘篚者各位於其後朝獻日行事前太常  
又實以爵

府卿帥其屬陳幣於篚幣蒼少府監帥其屬入陳禮神之

玉置於聖像前玉以四圭有卅光祿卿帥其屬入實籩豆簋簠

籩三行以右為上第一行形鹽在前黎糗餌次之第二  
行榛實在前乾桃乾棣乾棗次之第三行菱在前芡棗  
乾柿次之豆三行以左為上第一行芹菹在前荀菹菁  
菹葵菹次之第二行韭在前麩筋松脯藟脯次之第三  
行鮑食在前瓜薑醬次之簋實以黍簋實以稻太官令帥其屬入實俎籩前之俎實以

餅乳良醖令帥其屬入實罇著罇二一實玄酒一實醖齊皇帝酌之壺罇二一實玄酒

一實盎齊亞終獻酌之太罇二一實泛齊一實醖齊山  
罇二一實盎齊一實醖齊犧罇二一實沈齊一實事酒

象罇二一實昔酒一實清酒並設而不酌凡罍之實各視其罇

有司設神御殿禮饌及

供奉之物如常儀太常設燭於聖像前又設大禮使以下行事執事官揖位於殿門外如告潔之位儀鸞司設神位版幄又設冊幄於殿門外各隨地之宜

### 省饌

前朝獻一日質明太社令帥其屬掃除宮之内外訖司罇彝帥執事者以祭器入設於位

凡設祭器皆藉以席簋豆又加巾蓋

太

府卿少府監入陳玉幣

告潔畢  
權徹

少頃禮直官贊者分引

大禮使以下並常服詣殿門外告潔位禮直官贊揖訖

贊揖者引押樂太常卿入行樂架

凡亞終獻行事皆禮直官太常博士引大

禮使執政官行事皆禮

直官引餘官皆贊者引

次引禮部尚書入升自西階

灑濯

凡行事執事官升降皆自西階內應奉官并執事祇應人各隨應奉階升降

次引左僕

射申祗灑濯執事者皆舉冪曰潔俱退復位禮直官稍

前曰告潔畢請就省饌位揖訖引大禮使以下各就位

禮直官贊揖有司省饌具畢禮直官贊省饌畢揖訖俱

還齋所次引禮部尚書詣厨祗灑濯既次引刑部尚書詣

厨實鑊水刑部侍郎增沃鑊水協律郎展視樂器乃還齋所晡後太社令帥其屬掃除宮之内外學士院以祝冊授通進司進御書訖降付尚書禮部

車駕自大慶殿詣景靈宮

朝獻日文武侍祠行事助祭之官宗室

非從駕者

先詣景靈

宮祠所次禮直官宣贊舍人引禮部侍郎詣大慶殿奏請中嚴少頃又奏外辦皇帝服履袍詣大慶殿鳴鞭行門禁衛諸班親從等諸司祇應人員以下各自贊常起



居次知客省事以下樞密都丞旨以下知內侍省事以下御帶器械官應奉祇應通侍大夫以下武功大夫以下及幹辦庫務文臣一班常起居俟皇帝即御座從駕宰執使相以下一班次管軍臣僚並常起居

若得旨免起居更不

起居皇帝乘輿鳴鞭出行宮北門將至景靈宮御史臺太

常寺閤門分引文武侍祠行事執事助祭之官宗室於

宮櫺星門外立班再拜奏御訖退

已起居者止奏聖躬萬福皇帝乘輿將及

門從駕宰執事從等係行事前導者先退各朝祭服

皇帝乘輿入櫺星門至大次

降輿以入簾降侍衛如常儀以俟行事

奉玉幣

朝獻日未行事前諸行事及助祭之官各服其服太祝奠冊於案太府卿少府監入陳玉幣光祿卿入實籩豆簋簋太官令入實俎良醞令入實罇罍樂正帥工人二舞以次入與執罇罍篚冪者各就位次御史臺太常寺問門宣贊舍人分引文武助祭官及宗室客使入就位次禮直官贊者分引大禮使以下行事執事官詣殿門

外揖位立禮直贊揖訖先引監察御史按視殿之上下  
糾察不如儀者降階就位次引大禮使以下各入就位  
次禮儀使樞密院官太常卿閤門官太常博士禮直官  
分立於大次外左右次引禮部侍郎詣次前奏請中嚴  
少頃又奏外辨符寶郎奉寶陳於宮架之側隨地之宜  
禮儀使當次前俛伏跪奏禮儀使臣某言請皇帝行事  
奏訖俛伏興還侍立

禮儀使奏  
禮畢准此

簾捲皇帝服袞冕以出

侍衛如常禮儀使以下前導至殿門外殿中監跪進大

主禮儀使奏請執大圭前導皇帝入自正門

侍衛不應入者止於

外門協律郎跪俛伏舉麾興工鼓祝宮架乾安之樂作

皇帝

升降行止皆奏乾安之樂

至阼階下偃麾戛鼓樂止

凡樂皆協律郎跪俛伏舉麾興

工鼓祝而後作偃麾戛鼓而後止

升自阼階夫樂使從

皇帝升降大禮使皆從

登

歌樂作

左右侍衛之官量人數從升

至版位西向立樂止禮儀使以

下分左右侍立

凡行禮皆禮儀使樞密院官太常卿閣門官太常博士禮直郎前導至位分立

於左

禮儀使前奏有司謹具請行事宮架作大安之樂

發祥流慶之舞俟樂作三成止先引左僕射吏部尚書

侍郎升詣聖祖座前立左僕射吏部尚書俱西向北上  
吏部侍郎東向樂作六成樂止禮儀使奏請再拜皇帝  
再拜贊者曰再拜在位官皆再拜內侍取玉幣於篚立  
於罇所又內侍各執盤匱悅巾以進宮架樂作禮儀使  
奏請皇帝搢大圭盥手內侍進槃匱沃水皇帝盥手內  
侍進巾皇帝悅手訖又奏請皇帝執大圭樂止禮儀使  
前導登歌靈安之樂作殿中監跪進圭禮儀使奏請搢  
大圭執鎮圭前導皇帝詣聖祖座前北向立內侍先設

繅藉於地禮儀使奏請跪奠鎮圭於繅席執大圭俛伏興又奏請搢大圭跪內侍加玉於幣以授吏部尚書吏部尚書以授左僕射左僕射西向跪以進禮儀使奏請受玉幣皇帝受奠訖吏部侍郎東向跪受以興進奠於聖像前左僕射吏部侍郎擢於殿上稍西東向立吏部尚書降復位禮儀使奏請執大圭俛伏興又奏請再拜皇帝再拜訖樂止禮儀使奏前導皇帝還版位登歌樂作至位西向立樂止內侍舉鎮圭繅藉以鎮圭殿中監

以授有司

薦饌

朝獻日太官令以饌實於俎及籩豆簠簋陳於饌幔內

東西相向

俎實以乳餅籩實以粉饗豆實以糝食簠實以梁簋實以黍稷

俟皇帝升奉

玉幣訖還位樂止次引禮部尚書詣饌所執籩豆簠簋

以入戶部尚書詣饌所奉俎以入太官令引入正門宮

架吉安之樂作設於西階下北向北上奉俎者在南次引禮部尚書揖笏執籩豆簠簋戶部尚書揖笏奉俎以

升執事者各迎於階上禮部尚書奉籩豆簋簋於聖像  
前北向跪奠訖執笏俛伏興有司設籩於糗餌前豆於  
醬前簋於稻前簋於黍前次戶部尚書奉俎於聖像前  
北向跪奠訖執笏俛伏興有司設於豆前樂止俱降復  
位次引左僕射吏部侍郎詣聖祖座前立左僕射西向  
吏部侍郎東向次引吏部侍郎奉爵升詣皇帝版位前  
北向立內侍各執盤匱帨巾以進宮架樂作禮儀使奏  
請皇帝搢大圭盥手內侍進盤匱沃水皇帝盥手內侍



進巾皇帝悅手訖又奏請皇帝洗爵吏部侍郎進爵內  
侍進巾皇帝拭爵訖樂止又奏請執大圭登歌祖安之  
樂作吏部侍郎受爵奉爵詣酌罇所東向立執罇者舉  
罇良醞令酌著罇之醴齊禮儀使前導皇帝詣聖祖座  
前北向立禮儀使奏請搢大圭跪吏部侍郎以爵授左  
僕射左僕射西向跪以進禮儀使奏請執爵進酒再進  
酒三進酒俱以爵授吏部侍郎吏部侍郎東向跪受爵  
置於聖祖座前禮儀使奏請執大圭俛伏興又奏請皇

帝少立樂止左僕射以下俱復位舉冊官搢笏跪舉祝冊讀冊官搢笏東向跪讀冊文讀訖奠冊各執笏興俱降復位禮儀使奏請再拜皇帝再拜訖禮儀使前導皇帝還版位登歌樂作至版位西向立樂止文舞退武舞進宮架正安之樂作舞者立定樂止禮直官太常博士引亞獻詣盥洗位北向立搢笏盥手悅手執笏詣爵洗位北向立搢笏洗爵拭爵以爵授執事執笏升詣酌罇所東向立宮架作冲安之樂降真觀德之舞執事者以

爵授亞獻亞獻搢笏跪執爵執罇者舉罇太官令酌壺  
罇之盞齊亞獻以爵授執事者執笏興詣聖祖座前北  
向搢笏跪執事者以爵授亞獻亞獻執爵三進酒執笏  
俛伏興少退北向再拜訖樂止降復位初亞獻行禮將  
畢禮直官太常博士引終獻詣洗及升殿酌獻並如亞  
獻之儀訖降復位初終獻既升獻戶部禮部尚書升詣  
殿西東向立次引殿中監太祝太官令詣飲福東向立  
奉豆及爵酒者各立於其後禮儀使奏請詣飲福位前

導皇帝登歌樂作將至位樂止又登歌報安之樂作皇  
帝至飲福位北向立尚醞奉御執罇詣酌罇所良醞令  
酌上罇福酒各置二罇尚醞奉御酌福酒殿中監西向  
奉以立禮儀使奏請再拜殿中監跪以爵酒進禮儀使  
奏請搢大圭跪受爵祭酒

三祭於地

啐酒奠爵殿中監跪受

爵以興太官令取黍於簋搏以授太祝太祝受以豆東  
向跪以進皇帝受豆奠之太祝乃受以興降復位次殿  
中監再跪以爵酒進禮儀使奏請受爵飲福酒奠爵殿

中監受虛爵以興以授尚醞奉御執事者俱降復位禮儀使奏請執大圭俛伏興又奏請再拜皇帝再拜樂止禮儀使前導皇帝還版位登歌樂作至版位西向立樂止次引禮部尚書詣聖像前徹籩豆次戶部尚書徹俎籩豆俎各一俱少移故處登歌吉安之樂作卒徹樂止禮部戶部尚書降復位禮直官曰賜福酒行事助祭官拜贊者承傳曰賜福酒再拜在位官皆再拜送真宮架太安之樂作一成止

望燎

太安之樂畢禮儀使奏請詣望燎位前導皇帝詣望燎位登歌樂作降自阼階樂止宮架樂作至位南向立樂止初賜福酒再拜訖吏部侍郎帥太祝執篚進詣聖祖座前取幣祝冊執事官以俎載黍稷飯及爵酒降階置於柴上禮直官曰可燎東西各以炬燎半柴禮儀使奏禮畢前導皇帝還大次宮架樂作出門外禮儀使奏請釋大圭殿中監跪受大圭以授有司侍衛如常儀皇帝

至大次樂止禮部奏請解嚴次引大禮使以下詣殿門  
外揖位立禮直官贊禮畢揖訖退宣贊舍人等分引文  
武助祭官及宗室客使以次出次引諸神御殿分獻官  
及太祝各入就位太祝在南北向分獻官在東西向

神御

殿獻官太祝俱常服

贊者曰再拜在位官皆再拜太祝升詣香案

之西東立次引分獻官升詣香案前北向立搢笏三上  
香跪執瓊奠茶三奠酒執笏俛伏興少立太祝跪讀祝  
文讀訖以興舉版置於案降復位分獻官再拜訖降復

位退其後南郊並如儀

先公遺老齋雜誌景定庚申秋大享明堂以余為  
殿中監進接圭官明堂之禮主上執大圭以行事  
奠鎮圭以禮神圭之為性潤滑上所執處以錦纏  
之供奉官則以腦子粉澤手防滑墜也二圭皆以  
中貴一員掌之太常寺吏一人隨直皆在殿中監  
左右上詣景靈宮入思成門則跪進大圭上執以  
行至大次釋圭以授殿中監入大次暨奏中嚴外



辦捲簾跪進如初上執詣褥位其時殿中監急趨  
祐室外奉鎮圭以俟須臾上且至入室禮吏喝云  
搢大圭執鎮圭上既自搢於腰間遂跪進鎮圭上  
受以奠於神幣前禮吏又喝云執大圭上自腰間  
取以執則殿中監急就神幣前取鎮圭入第二室  
凡禮吏之引喝殿中監之跪進一如初室至十三  
室然後獻禮畢上執圭就褥位東向立以俟亞終  
獻行禮凡明堂行禮之日設大次於殿廊上入俟

嚴辦設小次於殿門右上還小次以俟亞終獻行禮然祖宗嚴禋帝祖例不還小次示恭勤也上暮年有內迫之症既還褥位余方在室中收鎮圭以付內侍實不在上前忽聞有旨還小次內侍於上手取圭以從還余方至太常少卿趙與峕呵詰曰殿中監何在上還小次無人接圭余為震恐因思惟有自劾待罪而已禮吏曰祖宗時未嘗還小次此謂之非次還內尊官若待罪乃顯上失宜付之

妄言余心是之但從內侍取大圭跪俟小次簾外而已須臾捲簾進圭上執詣飲福受胙位授受行禮既畢復詣望座位禮畢詣殿門俟上至而後畢事自初日朝獻景靈宮次日朝享太廟又次日明堂殿行禮皆如之禮云凡執玉執輕如不克況與人主相授受乎其最可畏者上將入門跪進大圭圭進訖急趨旁側立恐妨天步之入也上將出門跪接接訖又急趨旁側立恐妨天步之出也當是

時倉皇失措在俄頃間耳非夫平日端莊敬懼者  
不在此選朝廷蓋重其人難其事云

右宋朝太廟原廟祭禮惟郊祀前親享為盛儀注  
已見於前遺老齋雜誌所書執圭一則并附見於  
此

四孟朝獻景靈宮儀注

齋戒

朝獻前一日皇帝齋於內殿御崇政殿視事如故唯不

弔喪問疾作樂有司不奏刑殺文書其行事前導官齋  
於本司治事如故唯不判書刑殺文書及行刑

### 陳設

前期有司陳香案及供奉之物於聖祖天尊大帝元天  
大聖后并諸帝后位前儀鸞司設御幄於殿東廡西向  
設皇帝褥位於殿下東階之東西向及鋪設黃道裯褥

并逐香案前褥位

內第二日上  
詣後殿行禮

### 朝獻

其日質明皇帝服履袍出內即御座鳴鞭行門禁衛諸班親從等諸司祇應人員已下於崇政殿各自贊常起居次從駕臣僚并應奉前導陪位官并管軍於崇政殿起居如閤門儀訖先退以俟從駕俟皇帝自崇政殿乘輦出行宮北門將至景靈宮侍臣前導及陪位官於景靈宮櫺星門外殿門外迎駕起居再拜訖次有司引陪位官先詣殿下北向立禮直官太常博士太常卿詣御幄前北向立禮直官引侍臣二員升殿詣聖祖天尊大

帝香案前東西相向對立

諸帝后御前即引侍臣一員於香案前西向立俟進接茶

酒畢止於殿上稍東西相向立

陪位文武官入詣殿下北向立定俟皇

帝乘輦入櫺星門於東廊便門步至御幄簾降閣門官

於東幄前相向立閣門報班齊禮直官太常博士引太

常卿於御幄前俛伏跪奏稱太常卿臣某言請皇帝行

朝獻之禮奏訖伏興

奏禮畢准此

簾捲太常卿閣門官太常

博士禮直官前導皇帝詣殿下褥位西向立

凡行禮皆太常卿閣

門官太常博士禮直官前導至位即分立於左右

太常卿奏請拜皇帝再拜贊

者曰拜在位官皆再拜訖前導官前導皇帝升自東階詣聖祖天尊大帝位香案前褥位北向立內侍奉香太常卿奏請上香再上香三上香內侍以茶酒授侍臣侍臣西向跪以進又奏請皇帝跪進茶進酒再進酒三進酒以授侍臣侍臣置於聖祖天尊大帝位前又奏請俛伏興又奏請拜皇帝再拜贊者曰拜在位官皆再拜訖前導官前導皇帝降自東階詣殿下褥位西向立奏請拜皇帝再拜贊者曰拜在位官皆再拜訖前導官前導



皇帝還御幄簾降太常卿奏禮畢訖行事前導陪位官等先詣中殿立班如前殿儀俟皇帝詣中殿御幄簾降閣門報班齊禮直官太常博士引太常卿於御幄前俛伏跪奏稱太常卿臣某言請皇帝行朝獻之禮奏訖伏

興

奏禮畢准此

簾捲太常卿閣門官太常博士禮直官前導

皇帝詣殿下褥位西向立太常卿奏請拜皇帝再拜贊者曰拜在位官皆再拜前導官前導皇帝升殿詣宣祖皇帝位香案前褥位北向立內侍奉香太常卿奏請上

香再上香三上香內侍以茶酒授侍臣侍臣西向跪以進又奏請皇帝跪一奠茶奠酒再奠酒三奠酒俛伏興又奏請拜皇帝再拜贊者曰拜在位官皆再拜訖次詣太祖皇帝太宗皇帝真宗皇帝仁宗皇帝英宗皇帝神宗皇帝哲宗皇帝徽宗皇帝欽宗皇帝神御神案前行禮並如上儀訖前導官前導皇帝降自東階殿下褥位西向立奏請拜皇帝再拜贊者曰拜在位官皆再拜訖前導官前導皇帝還御幄簾降太常卿奏禮畢訖陪位

行事前導應奉官以次退皇帝歸齋殿以俟還內如來

儀次日皇帝自內乘輦入櫺星門將至宮門就露屋降輦步至齋殿由後殿之後至後殿東廊御幄以俟詣元天大聖后次詣昭憲皇后孝明皇后懿德皇后明德皇后元德皇后章穆皇后章憲明肅皇后章懿皇后慈聖光獻皇后宣仁聖烈皇后欽聖憲肅皇后欽成皇后欽慈皇后昭慈聖獻皇后昭懷皇后顯恭皇后顯肅皇后神御香案前行禮並如前殿中殿之儀

第一日

其日質明皇帝服靴袍出內即御座鳴鞭行門禁衛諸班親從等諸司祇應人員以下於後殿各自贊起居次從駕臣僚并應奉前導陪位官等先詣中殿立班如前殿儀俟皇帝詣中殿御幄簾降閤門報班齊禮直官太常博士引太常卿於御幄前俛伏跪奏稱太常卿臣某言請皇帝行恭謝之禮奏訖伏興

秦禮畢准此

簾捲太常卿

閤門官太常博士禮直官前導皇帝升詣殿上褥位西

向立太常卿奏請拜皇帝再拜贊者曰拜在位官皆拜  
訖前導官前導皇帝詣宣祖皇帝位香案前褥位北向  
立內侍奉香太常卿奏請上香再上香三上香內侍以  
茶酒授侍臣侍臣西向跪以進又奏請皇帝跪奠茶酒  
再奠酒三奠酒俛伏興又奏請拜皇帝再拜贊者曰拜  
在位官皆再拜訖次詣太祖皇帝太宗皇帝真宗皇帝  
仁宗皇帝英宗皇帝神宗皇帝哲宗皇帝徽宗皇帝欽  
宗皇帝神御香案前行禮並如上儀訖前導官前導皇

帝還褥位西向立奏請拜皇帝再拜贊者曰拜在位官  
皆再拜訖前導官導皇帝還御幄簾降太常卿奏禮畢  
訖陪位行事前導應奉官以次退帝歸齋殿以俟還內  
依已降指揮駕  
回入祥曦殿門

第二日

淳熙九年恭謝分作三日行禮內第二日詣後殿元天大聖后并昭憲皇后至

慈聖光獻皇后第三日詣後殿宣仁聖烈皇后以下神御

皇帝自內乘輦入櫺星門至齋殿降輦步至後殿東廡  
御幄以俟詣元天大聖后次詣昭憲皇后孝明皇后懿

德皇后明德皇后元德皇后章穆皇后章獻明肅皇后  
慈聖光獻皇后宣仁聖烈皇后欽聖憲肅皇后欽成皇  
后欽慈皇后昭慈聖獻皇后昭懷皇后顯恭皇后顯肅  
皇后顯仁皇后神御香案前行禮並如前殿中殿之儀

太祖親享廟四

乾德元年十一月十五日 開寶元年十一月二十三日 四年十一月二十

六日係親郊朝廟 將幸西京行雩祀禮

開寶九年三月五日係親告

太宗親享廟五

太平興國三年十一月十四日 六年十一月十六日 雍熙元年十一月二

十日 淳化四年正月一日 至道二年正月九

日係親郊朝享

真宗親享廟十二

咸平二年十一月六日 五年十一月十一日 景德二年十一月十二日

日 天禧元年正月十日 三年十一月十八日

係親享朝廟 大中祥符元年九月十日係親告

將行封禪禮 十一月二十七日係封禪禮成恭

謝 三年十二月十一日係親告將祀汾陰 四

年四月六日係汾陰禮成親謁 五年閏十月七

日係聖祖降恭謝 六年十二月十五日係親告

將謁太清宮 七年二月十五日係東郊恭謝朝

享

仁宗親享廟十三

天聖二年十一月十二日 五年十一月十六日 八年十一月十八日

景祐二年十一月十三日 寶元元年十一月

十七日 慶厯元年十一月十九日 四年十一

月二十四日 七年十一月十七日 皇祐五年

十一月三日係親郊朝享 皇祐二年九月二十



六日 嘉祐七年九月六日係親祀明堂朝享  
嘉祐四年十月十二日係親行祫祭 天聖十年  
十一月十一日係修大內恭謝

英宗親享廟一

治平二年十一月十五日係親郊朝享

神宗親享廟六

熙寧元年十一月十七日 七年十一月二十四日 十年十一月二十六日

元豐六年十一月四日係郊祀朝享 熙寧四年九月九日 元豐三年九月二十日祀明堂朝享

哲宗親享廟五

元祐元年九月五日 元祐四年九月十三日 元祐七年十一月十二日

元符元年十一月十九日係親郊祀朝享 紹聖二年九月十八日係祀明堂朝享

徽宗親享廟九

建中靖國元年十一月二十二日 崇寧三年十一月二十五日 大觀四年

十一月二日

政和三年十一月五日

六年十

一月九日

宣和元年十一月十二日

四年十

一月十四日

七年十一月十四日係冬祀朝享

大觀元

年九月二十七日係郊祀朝享

高宗親享廟十

紹興七年九月二十一日 十年九月九日並明堂享廟 十三年正月十一

日係奉上徽宗皇帝徽號冊寶享廟

十一月七

日 十六年十一月九日

十九年十一月十三

日 二十二年十一月十七日

二十五年十一

月十八日 二十八年十一月二十二日並係親

郊享廟

三十一年九月一日係明堂享廟

孝宗親享廟十

紹興三十二年七月十四日 隆興二年十二月二十九日 乾道三年十一

月一日 六年十一月五日 九年十一月八日

淳熙三年九月六日 六年九月十五日 九

年九月十二日 十二年十一月二十二日 十

五年九月八日

光宗親享廟二

淳熙十六年四月六日 紹興二年十  
一月二十六日

寧宗親享廟八

慶元三年十一月壬寅 嘉泰三年十  
一月癸酉 開禧二年閏 嘉

定二年九月庚子 嘉定五年十一月辛酉 八

年九月庚午 十一年九月庚辰 十四年九月

庚寅


按古者宗廟之祭有正祭有告祭皆人主親行其

禮正祭則時享禘祫是也告祭則國有大事告於

宗廟是也自漢以來禮制隳廢郊廟之祭人主多  
不親行至唐中葉以後始定制於三歲一郊祀之  
時前二日朝享太清宮太廟次日方有事於南郊  
宋因其制於第一日朝享景靈宮第二日朝享太  
廟第三日於郊壇或明堂行禮國史所書親享太  
廟大率皆郊前之祭然此乃告祭禮所謂卜郊受  
命於祖廟作龜於禰宮所謂魯人將有事於上帝  
必先有事於泮宮是也若正祭則未嘗親行雖禘

祫大禮亦命有司攝事累朝惟仁宗嘉祐四年十月親行祫祭禮一次而已蓋法駕屬車其鹵簿鄭重裸薦升降其禮節繁多故三歲享帝之時僅能舉一親祠然告祭之事亦有大於祀天者如即位而告廟則自舜禹受終以至太甲之見祖成王之見廟皆是也雖西漢時人主每嗣位亦必有見高廟之禮而自唐以來則人主未嘗躬謁宗廟致祭以告嗣位宋朝惟孝宗光宗以親受內禪特行此


禮而其他則皆以喪三年不祭之說為拘不復舉  
行然自以日易月之制既定諒闇之禮廢久矣何  
獨於嗣位告祭一事以為不可行乎慶元間李大  
性李謙所言可謂至論要之親享既不能頻舉則  
合於禘祫大祀行之而嗣位告祭則亦必合親行  
如卜郊之祭則三歲常行之事又只為將有事於  
上帝而告白則本非宗廟之大祭有司攝事足矣  
文獻通考卷九十九



總校官庶吉士 臣 張能照

校對官檢討 臣 廬 應

謄錄監生 臣 呂永安



財團 佛陀教育基金會 釋淨空 敬贈

財團 佛陀教育基金會 釋淨空 敬贈